

Premi schurnalistic SRG.R 2015

Astrid Alexandre «Med Ursina i København»

■ (cp) Il Cussegl dal public SRG.R (CDP SRG.R) ha surdà il Premi schurnalistic SRG.R 2015 ad Astrid Alexandre. Ella è vegnida undrada per la contribuziun «Med Ursina i København» en l'emissiun da profundaziun Marella dal Radio Rumantsch. L'emissiun da var in'ura fa part dal program regular e tracta profundamain in tema. Il Premi schurnalistic SRG.R onurescha products schurnalistics da la chasa RTR. La giuria, che consista da tschintg commembers dal CDP SRG.R, ha tadlà e guardà las radund 35 contribuziuns inoltradas. Per il Premi schurnalistic SRG.R 2015 ha ella nominà las suandantas emissiuns e contribuziuns:

- «Med Ursina i København» *Astrid Alexandre* (radio)
- «Amur, lavur u aventura» *Esther Berther* (radio)
- «Import Export – Ils affars interessants da Mattias Bulfoni» *Martin Cantieni* (televisiun)
- «Complicato – tanto complicato» *Eli-gi Derungs* (televisiun)
- «In'emna turbulenta a Ftan / Dossier: Institut Otalpin Ftan» *David Truttmann* e ses team (televisiun/online)

Da questas propostas han las commembras ed ils commembers dal CDP SRG.R lura tschernì la victura Astrid Alexandre cun la Marella «Med Ursina i København». Il premi è dotà cun 6000 francs.

«Med Ursina i København»

Astrid Alexandre ha realisà la Marella «Med Ursina i København» ch'è vegnida emessa per l'emprima giada il fanadur 2015. L'emissiun purtatescha *Ursina*



Il Premi schurnalistic SRG.R 2015 va ad Astrid Alexandre.

MAD

Giger a Copenhagen e transmitta grondius impressiuns da questa citad. Astrid Alexandre maina a moda simpatica e suverana tras l'emissiun. Questa Marella fa gust sin dapli e dilucidescha la citad da Copenhagen en tut sias fassetas. Kino per las ureglias en il Radio Rumantsch. Astrid Alexandre ha causa ina represchentaziun cun la grupp La Triada betg pudì sa participar a la surdada dal premi. Ella è vegnida represchentada da *Gua-dench Dazzi*, producent Reflexiun. Ursina Giger ha tegnì la laudatio cun ina contribuziun da video.

Adriano Iseppi drizza il focus sin il schurnalissem da sport

En in referat ha *Adriano Iseppi* rapportà davart il schurnalissem da sport ord differentas perspectives. L'anterieur schef da la disciplina passlung tar Swiss Ski e magister da sport è commentatur da passlung tar SRF Schweizer Radio und Fernsehen. El instruescha a la scola da sport e musica a San Murezzan. Il victur d'ina medaglia al Campiunadi mundial da telemarc enconuscha il sport ord diversas perspectives.